



**State Mufti's Office**  
*Prime Minister's Office*  
**Brunei Darussalam**

## **MENYAPU KHUFF (MUZA): MEMUDAHKAN BERWUDHU' KETIKA DALAM PELAYARAN**

**(Bilangan Pertama)**

*(Dengan nama Allah, Segala puji bagi Allah, Selawat dan salam ke atas  
Rasulullah Shallallahu 'alaihi wasallam, keluarga, sahabat dan para pengikut Baginda)*

### **Apakah Syarat-Syarat Menyapu *Khuff* Dengan Air?**

Terdapat lima syarat yang dikenakan untuk mengharuskan seseorang itu menyapu *khuff*nya dengan air sebagai ganti membasuh kaki ketika mengambil *wudhu'* seperti berikut:

- 1) Kedua-dua *khuff* hendaklah dipakai setelah sempurna suci daripada hadats kecil dan hadats besar.**

Perkara ini adalah berdasarkan apa yang diriwayatkan oleh al-Mughirah bin Syu'bah *Radhiallahu 'anhu*, beliau berkata:

“ . . . ” . . .  
( )

**Maksudnya:** “*Aku pernah bersama Nabi Shallallahu ‘alaihi wasallam dalam satu pelayaran dan aku cuba membongkok untuk menanggalkan kedua-dua khuff Baginda, akan tetapi Baginda bersabda: “Biarkanlah kerana saya telah memakainya ketika dalam keadaan suci”.* Lalu Baginda menyapu air pada kedua-dua khuff Baginda itu.

(Hadits riwayat al-Bukhari)

Berdasarkan syarat ini, apabila orang yang mengambil *wudhu’* memakaikan *khuff* pada kakinya sebelah kanan sebelum dia membasuh kakinya sebelah kiri, kemudian setelah selesai membasuh kaki sebelah kirinya pula dia memakaikan *khuff* pada kakinya sebelah kiri, tidak diharuskan baginya ber*wudhu’* dengan hanya menyapu air pada *khuff* tersebut apabila dia hendak ber*wudhu’* lagi selepas itu. Ini kerana dia memakai *khuff*nya sebelum lagi sempurna suci daripada hadats.

- 2) **Hendaklah *khuff* itu menutupi seluruh anggota kaki yang wajib dibasuh ketika ber*wudhu’* dari semua sudut kecuali dari atas iaitu semua kaki dan kedua buku lali.**

Jika *khuff* itu tidak menutupi seluruh tempat yang wajib dibasuh ketika ber*wudhu’* atau terdapat lubang pada *khuff* di sekitar tempat yang wajib dibasuh tidak sah ber*wudhu’* dengan hanya menyapu air pada *khuff* seperti itu.

Yang dimaksudkan dengan menutupi itu ialah menghalang air dari terkena bahagian kaki yang wajib dibasuh. Bukannya bererti menutupi dari penglihatan seperti yang disyaratkan dalam perkara menutup aurat.

- 3) Hendaklah *khuff* itu dapat menahan air dari menembusi ke bahagian kaki kecuali melalui tempat jahitan.**

Mengikut pendapat yang *ashah*, harus juga menyapu *khuff* yang terbelah dari kaki tetapi diikat dengan tali sehingga ia tidak menampakkan mana-mana bahagian yang wajib dibasuh apabila dibawa berjalan.

- 4) Hendaklah *khuff* itu kuat dan tahan.**

Sukat-sukat ketahanan *khuff* itu boleh dipakai berjalan dengannya untuk melaksanakan keperluan atau hajat yang biasa dalam tempoh sehari semalam bagi orang bermukim dan tiga hari tiga malam bagi musafir. Tidak kira sama ada *khuff* itu diperbuat dari kulit atau selainnya.

- 5) Hendaklah *khuff* itu suci daripada najis.**

Tidak sah menyapu air pada *khuff* yang diperbuat dari kulit bangkai yang belum disamak. Ini kerana kulit seperti itu tidak boleh dipakai untuk mengerjakan sembahyang.

### **Berapa Lama Tempoh Yang Dibenarkan Untuk Menyapu *Khuff*?**

Setelah cukup segala syarat-syarat yang ditentukan, apabila hendak mengambil *wudhu'* semula tidaklah perlu dibuka *khuff* yang telah dipakai ketika dalam keadaan suci daripada hadats besar dan kecil, dan tidaklah perlu juga dibasuh kedua kaki ketika mengambil *wudhu'*. Tetapi cukup dengan menyapu atau mengusapkan air pada *khuff* yang dipakai iaitu sebagai ganti membasuh kaki.

Tempoh yang dibenarkan untuk menyapu atau mengusapkan air pada *khuff* sebagai ganti membasuh kaki ialah:

1. Sehari semalam bagi orang bermukim (bukan dalam pelayaran).
2. Tiga hari tiga malam bagi orang yang dalam pelayaran.

Penentuan tempoh di atas adalah berdasarkan riwayat bahawa Saidina 'Ali *Karramallahu Wajhah* berkata:

( )

**Maksudnya:** “*Rasulullah Shallallahu ‘alaihi wasallam menentukan (tempoh menyapukan air pada khuff ketika berwudhu’) tiga hari tiga malam bagi orang musafir dan sehari semalam bagi orang yang bermukim*”.

(Hadits riwayat Muslim)

Oleh itu selama mana tempoh yang dibenarkan belum habis, selama itu juga orang yang memakai *khuff* itu dibenarkan mengambil *wudhu'* dengan tidak payah membasuh kakinya tetapi cukup dengan hanya menyapu pada *khuff* yang dipakainya.

Jika orang yang memakai *khuff* itu merasa ragu (syak) adakah tempoh yang dibenarkan kepadanya masih ada atau sudah habis, maka dalam hal ini tidak boleh baginya menyapu *khuff* ketika mengambil *wudhu'* sebagai ganti membasuh kaki, akan tetapi hendaklah dia membasuh kakinya sebagaimana biasa dia mengambil *wudhu'*nya. Jika syaknya itu hilang dan dia yakin tempoh yang dibenarkan kepadanya masih ada, pada ketika itu diharuskan baginya menyapu *khuff*nya.

## **Bila Tempoh Bermula?**

Tempoh masanya dikira bermula dari berakhir hadatsnya selepas memakai *khuff*, bukannya dari mula berhadats atau dari mula menyapu *khuff*.

Sebagai contoh, pada pukul 12.00 tengah hari seorang itu mengambil *wudhu*, kemudian dia memakai *khuffnya*. Selepas itu dia mendirikan sembahyang Zuhur. Kira-kira pada pukul 2.00 petang *wudhu*'nya terbatal. Kerana hendak mendirikan sembahyang 'Asar, pada pukul 3.00 petang dia mengambil *wudhu*' dan menyapu *khuffnya* dengan air sebagai ganti membasuh kaki.

Dalam contoh di atas, tempoh sehari semalam (bagi orang bukan dalam pelayaran) atau tiga hari tiga malam (bagi orang yang dalam pelayaran) bermula dikira dari jam 3.00 petang bukannya dari jam 12.00 tengah hari atau 2.00 petang.

Dengan demikian, jika dia seorang yang bukan dalam pelayaran, dia boleh menyapu *khuffnya* ketika mengambil *wudhu*' sehingga jam 2.59 petang keesokan harinya. Jika dia seorang yang dalam pelayaran pula, dia boleh menyapu *khuffnya* ketika mengambil *wudhu*' sehingga jam 2.59 petang hari keempat.

Apabila seorang itu menyapu *khuffnya* sewaktu bermukim (bukan dalam pelayaran) kemudian dia pergi belayar ataupun sebaliknya iaitu dia menyapu *khuffnya* ketika dalam pelayaran kemudian dia bermukim, maka kiraan tempohnya adalah seperti tempoh orang yang bermukim. Oleh itu, dia hanya dibolehkan menyapu *khuffnya* selama sehari semalam sahaja.

## **Bagaimana Cara Menyapu Air Pada *Khuff*?**

Apabila seorang itu hendak menyapu *khuffnya* dengan air ketika ber*wudhu*', yang wajib disapu ialah sedikit dari bahagian atas sebelah luar *khuff*. Ini adalah bercontoh daripada perbuatan Rasulullah *Shallallahu 'alaihi wasallam* sebagaimana yang

diriwayatkan oleh al-Mughirah bin Syu‘bah *Radhiallahu ‘anhu*, beliau berkata:

( )

**Maksudnya:** “*Aku telah melihat Nabi Shallallahu ‘alaihi wasallam menyapu di atas kedua khuff Baginda di sebelah luarnya*”.

(Hadits riwayat at-Tirmidzi)

Namun begitu, sunat juga hukumnya menyapu pada bahagian atas dan bawah *khuff* dengan cara berikut:

- Masukkan (rendam) kedua belah tangan ke dalam air.
- Kemudian letakkan tapak tangan kanan dalam keadaan anak-anak jari dijarangkan pada bahagian atas *khuff* yang dimulai dari hujung jari-jari kedua kaki sebelah kanan, dan letakkan tapak tangan kiri pada bahagian bawah tumit.
- Setelah itu dilalukan tangan kanan hingga ke betis dan tangan kiri dilalukan hingga ke hujung jari.
- Begitulah juga cara yang dilakukan apabila menyapu *khuff* sebelah kaki kiri.

Cara ini adalah seperti yang diriwayatkan oleh Al-Mughirah bin Syu‘bah *Radhiallahu ‘anhu*, beliau berkata:

( )

**Maksudnya:** “*Aku telah menyediakan air untuk Nabi Shallallahu ‘alaihi wasallam berwudhu pada peperangan Tabuk. Maka Baginda menyapukan air pada bahagian atas dan bawah kedua-dua khuff Baginda.*”

(Hadits riwayat Abu Daud)

Tidak disunatkan menyapu *khuff* dengan berulang-ulang, bahkan menyapu secara berulang-ulang hukumnya makruh. Oleh itu adalah memadai dengan sekali sapu sahaja.

Tidak memadai dengan hanya menyapu bahagian bawah *khuff* sahaja, kerana tidak ada sandaran dalil yang mengatakan begitu.

*bersambung*